



Cussegliaer guvernativ Martin Jäger (a san.) e Simon Willi, president communal da Lantsch.



Eva Riedi durant sia preschertaziun da la retschertga.

I dovrà ina gasetta rumantscha dal di

Lantsch: Radunanza generala da la Lia Rumantscha

DA GION NUTEGN STGIER / ANR

■ La digitalisaziun saja en l'avegnir er in grond tema tar las medias rumantschas. La tendenza saja che las medias rumantschas duajan dar dapli muntada als temas regiunals. Quai conferma almain ina retschertga fatga en incumbensa da la Lia Rumantscha tar il tema gasetta dal di rumantscha. A Lantsch è sa radunads sonda ils delegads e las delegadas da la Lia Rumantscha per salvar la radunanza generala 2017. Johannes Flury, il president da la Lia Rumantscha, ha ditg en ses pled ch'el deploraschia ferm ch'en il Grischun vegnia dà savens memia pauc pais a la trilinguitad. Gist en connex cun signalisaziuns da traffic ed infurmaziuns publicas manchia la trilinguitad. Quella saja in gronda ritgezza culturala da noss chantun e quai saja da dir a l'entira Svizra. Flury è er da l'opiniun che l'economia avessia da duvrar e promover dapli la trilinguitad che saja propi unica en il Grischun. Sa drizzà als preschents è er Simon Willi, il president communal da Lantsch. El ha fatg attent a la situaziun difficila dal rumantsch en sia vischnanca. In fatg pla-schaivel saja tuttina ch'ins audia puspè pli savens il rumantsch sin plazza da scola, quai cun la fusiun da las scolas rumantschas en Val Alvra.

In concept cumplessiv

Quest atun ha la Lia Rumantscha lantschè en cooperaziun cun la confederaziun ed il chantun il project «Medias rumantschas 2019», in'iniziativa naschida en connex cun la discussiun davart l'avegnir da la Quotidiana. «L'intenziun saja da sviluppar in concept cumplessiv che includa tut las medias rumantschas e tegna quint da novas tendenzas en la publicaziun schurnalistica, da l'aspect sur-regiunal e betg il davos dals basegns da las consumantas e dals consuments», ha menziunà Martin Gabriel, il secretari ge-



La suprastanta partenta Maria Sedláček (a san.) cun sia successura Angela Jann.

FOTOS G. N. STGIER

neral da la Lia Rumantscha. El ha preschertà il stan actual dal project ensemen cun Eva Riedi che accumpogna il process da lavur entaifer la gruppa da project.

Be duas fin trais giadas l'emna

In emprim pass e vegnì fatg cun la retschertga da l'institut Link che ha intercurri la tenuta envers ina purschida da gasetta rumantscha en general e La Quotidiana en spezial. Fatga è la retschertga vegnida per telefon e dumandà han ins 400 persunas e da quellas 70 da la Bassa. 83% da las persunas dumandadas èn da l'avis ch'i dovria ina gasetta rumantscha dal di. Sa resultà è lura er che 81% dals abunents da La Quotidiana acceptessan er sche la gasetta cumparess be mo duas fin trais giadas l'emna. Passa la mesadad dals lecturs fissan lura er pronts da leger

ella en ina furma digitala. Plinavant sorta da la retschertga che 44% dals lecturs èn sur 60 onns. Be 16% èn sut 35 onns. Legida vegn La Quotidiana principalmain pervi dals temas locals. La purschida da la gasetta digitala, quella saja necessaria, è vegnì ditg repetidamain, cunzunt davart dals delegads pli giuvens.

I dovrà in concept persistent

L'impurtanza da la regiunalitad saja da gronda muntada per mintga gasetta rumantscha. Ditg han intgins preschents er che la regiunalitad signifitgia per mintgin insatge auter. La realitad saja dentant er che tuts lessan gasettas rumantschas, dentant pajar e finanziair ellas saja plitost secundar. Las gasettas rumantschas duesian daventar en l'avegnir pli idiomaticas, è er vegnì menziunà. Da gronda im-

purtanza saja da vegnir cun ina gasetta rumantscha dal di e cunzunt er cun in concept che saja persistent. Vegnì ditg è lura er anc che d'abunrar ina gasetta rumantscha dal di be per solidaritad na saja segir er nagina soluziun. Ina gasetta quotidiana saja da gronda valur per la promoziun ed il svilup dal rumantsch e da la lingua scritta.

Ina summa da maximalmain 100 000 francs

In auter tema impurtant per la cuntrada mediala rumantscha è senza dubi l'iniziativa «No Billag» che vegn suttamessa al pievel ils 4 da mars 2018. Ladina Heimgartner, directura dad RTR, ha appellà a la radunanza da refusar l'iniziativa. In'aprovaziun avess consequenzas gravantas per il service public, muntass la fin dad

RTR en la furma dad oz e periclitass pia ina pitga fitg impurtanta per la derasaziun dal rumantsch. Or dal plenum hai da plirs votums inquietads che han exprimì la necessitad da mobilisar la populaziun era sur ils cunfins chantunals or. La radunanza ha concludì in credit da maximalmain 100 000 francs che derivan da meds libers en possess da la Lia Rumantscha per activitads cunter l'iniziativa «No Billag».

Durant trais emnas vegn fatg festa

Il 2019 festivescha la Lia Rumantscha ses anniversari da 100 onns. Andreas Gabriel, il manader affars publics da la Lia Rumantscha, ha preschertà il concept inicial per las festivitads da giubileum che han lieu durant trais emnas l'avust 2019. Nua che quella festa ha lieu n'è da preschert betg anc enconuscent, dentant vischnancas che vulan organisar la festa principala han la pussaivladad da s'annunziar tar la Lia Rumantscha. I dat ina festa pli gronda en in lieu e lura intginas festas pli pitschnas en pliras regiuns. Integradà en la festa vegn cunzunt la giuventetgna e quai cun teater, chant e musica.

Angela Jann nova suprastanta

Durant tsching onns è Maria Sedláček (Sent) stada ina suprastanta fidada, seria e cun in grond engaschament. Sco commembra activa da l'Uniuin dals Grischs (UdG) ed en la suprastanza da la LR è ella s'engaschada onns a la lunga cun gronda perseveranza per la lingua e cultura rumantscha. En l'executiva da la Lia Rumantscha vegn ella remplazzada d'Angela Hann (Puntraschigna), la vicepresidente da l'Uniuin dals Grischs. Mutaziuns hai er dà en la cumissiun da gestiun. Seraina Fired, l'Engiadinaisa, succeda a l'Engiadinais Hermann Thom e per Gregor Spinaz (Sur) è vegnì elegi Sascha Janutin (Savognin).



Clers votums a favur d'ina gasetta rumantscha dal di er da Gion Lechmann.

Donat Nay, suprastant da la LR, Gion Cola, delegà CRR SRG e Daniel Albertin, deputà e president communal Albula/Alvra.

